

三經合卷

永六

佛說優填王經

佛說須摩提經

佛說須摩提菩薩經

佛說優填王經

西晉沙門釋法炬譯

聞如是一時佛在拘深國國王號口優填拘
深國有逝心名摩因提生女端正華色世間
少雙父親女容一國希有名曰無比隣國諸

王羣寮豪姓靡不甥焉父答曰若有君子容
與女齊吾其應之佛時行在其國逝心覩佛
三十二相八十種好身色紫金巍巍堂堂光
儀無上心喜而曰吾女獲匹歸語其妻曰吾
爲無比得壻促莊飾女將往也夫妻共服飾
其女步搖華光珠璣瓔珞莊飾光國夫妻共
將女至佛所妻道見佛跡相好之文光彩之
色非世所有知爲天尊謂其夫曰此人足跡
文理乃爾非世所聞斯將非凡必自清淨無
復姪欲將不取吾女無自辱也夫曰何以知

其然妻因說偈言

姪人曳踵行 患者歛指步 愚者足蹴地
斯跡天人尊

逝心曰非爾女人所知汝不樂者便自還歸
乃自將女往詣佛所稽首佛足白佛言大人
勤勞教授身無供養有是麤女願給箕箒佛
言汝以女爲好耶答曰生得此女顏容實好
世間無雙諸國王豪姓多有求者不以應之
竊見大人光色巍巍非世所見貪得供養故
宜自歸耳佛言此女之好爲著何許逝心曰

從頭至足周徧觀之無不好也佛言惑哉肉
眼吾觀之從頭至足無一好耶若頭上有髮
但是毛象馬之尾亦皆爾也髮下有髑髏但
是骨屠家豬頭骨亦爾也頭中有腦者如泥
腥臊逆鼻下之著地莫能蹈者目者是胞決
之純汁鼻中有涕口但有唾腹藏肝肺皆亦
腥臊腸胃膀胱但成屎尿腐臭難論腹爲韋
囊裏諸不淨四支手足骨骨相拄筋連皮韜
但恃氣息以動作之譬若木人機關作之既
畢解剥其體節節相離手足狼藉人亦如是

有何等好而云少雙昔者吾在貝多樹下第六魔王莊飾三女顏容華色天中無比非徒此倫欲以壞吾道意我爲說身中穢惡即皆化成老母形壞不復慚愧而去今是屎囊欲何所戀急將還去吾不取也逝心聞佛所說忽然慚恥無辭復言又白佛言若仁不取者更以妻優填王可乎不佛不答焉逝心即送女與優填王王獲女大悅拜父爲太傅爲女與宮妓樂千人以給侍之王正后師事佛得須陀洹道此女諧之於王王惑其言以百

箭射其后后見箭不懼都無恚怒一意念佛慈心長跪向王箭皆繞后三匝還住王前百箭皆爾王乃自驚悵然而懼即駕白象金車馳詣佛所未到下車辟從步進稽首佛足長跪自陳曰吾有重咎在三尊所以彼姪妖縱永六欲興邪於佛聖衆每一惡念以箭百枚射佛弟子如事陳之觀之心懼惟佛至真無量之慈白衣弟子慈力乃爾豈況無上正真佛乎我今首過歸命三尊惟佛弘慈原赦其咎佛笑曰善哉王覺惡悔過此明人行也吾受王

善意王稽首如是至三佛亦三受之王又頭面著地退就坐曰稟氣凶頑忿戾自恣無忍辱心三毒不除惡行快意順女妖邪不知其惡自惟壽終必入地獄願佛加哀廣說女惡魑魅之態入其羅網豈能自拔吾聞其禍必以自戒國民巨細得以改操佛言用此爲問具說餘義王曰餘事異日說之不晚女亂惑意凶禍之大不聞其禍何緣遠之願佛具爲吾釋地獄之變及女人之穢佛言具聽男子有姪之惡却覩女妖王曰善願受明教佛言

具聽男子有四惡急所當知世有姪夫恒想覩女思聞妖聲遠捨正法疑真信邪姪網所纏沒在盲冥爲欲所使如奴畏主貪樂女色不覺九孔惡露之臭穢渾沌欲中如豬處溷不覺其臭快以爲安不計後當在無擇之獄受痛無極注心在姪洩其涕唾翫其膿血珍之如玉甘之如蜜故曰欲態之士此爲一惡態也又親之養子懷妊生育稚得長大勤苦難論到子成人擢家竭財膝行肘步因媒表情致彼爲妻若在異域尋而追之不問遠近

不避勤苦注意在姪捐忘親老既得爲妻貴
之如寶欲私相娛樂惡見父母信其妖言或
致鬭訟不惟身所從生辜親無量之恩斯謂
二惡態也又人處世勤苦疲勞躬自致財本
有誠信敬道之意尊戴沙門梵志之心覺世
非常布施爲福取妻之後情感姪欲愚蔽自
擁背真向邪專由女色若有布施之意雖欲
發言相呼女色絕清淨行更成小人不識佛
經之重誠禍福之歸苟爲姪色投身羅網必
墮惡道終而不改斯謂三惡態也又爲人子

不惟養恩治生致財不以養親但以東西廣
求姪路懷持寶物招人婦女或殺六畜姪祀
鬼神飲酒歌僊合會之後互求方便更相招
呼以遂姦情及其獲偶喜無以喻姪結縛著
無所復識當爾之時惟此爲樂不覺惡露之
臭穢地獄之苦痛一則可笑二則可畏譬若
狂笑不知其非斯謂四惡態也佛言男子有
是四惡用墮三塗當審遠此能免苦耳復聽
說女人之惡佛便說偈言
已爲欲所使 放意不能安 習施於非法

將何以爲賢	欲爲畜生行	以爲還自殃
溷蟲在臭中	不知爲處難	如蟲在冥中
不知東以西	結著於姪欲	惡此亦蟲論
姪既不見道	日夜種罪根	現世君臣亂
上下爲迷昏	王法爲錯亂	正法爲迷焚
農夫捨常業	賈人爲彌連	現世更牢獄
死復入太山	當受百種毒	其痛難可言
洋銅灌其口	山車竿其身	比輦有百數
難可一一陳	常在三惡道	宛轉如車輪
若世時有佛	而已不得聞	女人最爲惡

難與爲因緣	恩愛一縛著	牽人入罪門
女人何爲好	但是屎尿囊	何不諦係視
爲此而狂荒	其內甚臭穢	外爲嚴飾容
家有含毒蠍	劇如蛇以龍	譬若錦韞矛
羅縠裹鋒鋌	愚者觀其表	翫之以自殃
智者覺而捨	癡者致死傷	姪欲亦如是
抱刃以自喪	覩新即厭故	所樂亦無常
言爲刀斧截	笑爲荊以棘	內懷臭穢毒
飾外以華香	癡人貪其味	不惟後受殃
譬如鴆毒藥	以和甘露漿	所向無不壞

飲之皆仆僵	亦如薪得火	草木被重霜
覩表不計裏	是爲最非祥	女毒甚於是
草乃見形傷	絕欲以求道	故有姪欲情
其形甚易見	癡人情不絕	羅網四面張
去道如絲髮	人本清淨種	如魚處深淵
智者乃自覺	著網不得還	欲網甚於是
結縛甚欲堅	投身冒荆棘	可得脫其身
譬若饑猿猴	望見熟甘果	專心投色欲
是輩百向墮	亦如魚食鉤	飛蛾入燈火
愚者見歡喜	不惟後受禍	

佛說如是優填王歡喜即以頭面著地白佛
言實從生已來不聞女人之惡乃爾男子勃
亂隨之墮罪但不知故不斷心意從今已後
終身自悔歸命三尊不敢復犯爲佛作禮歡
喜而去

表六

六

佛說優填王經